

Saopštenje za medije

Koalicija 143 – Jačanjem lokalne samouprave ćemo se izboriti za efikasnu i transparentnu vlast!

Koalicija 143 za lokalnu samoupravu u BiH je na konferenciji za medije u Olovu prezentirala svoju **Deklaraciju** kojom je označila početak **kampanje za lokalnu samoupravu i efikasniju i građanima/kama bližu vlast. Olovo je izabrano kao simbol** problema koje opštine u BiH imaju upravo zbog loših institucionalnih rješenja, te kao jedna od opština koja bi mogla da ima značajne koristi od rezultata rada Koalicije 143.

Koalicija 143 je sastavljena od **preko 15 organizacija civilnog društva iz BiH** i nastala je iz potrebe da u kompliciranom bosanskohercegovačkom institucionalnom uređenju **vlast približi narodu i učini je odgovornijom prema građanima/kama** zagovarajući jasnije, transparentnije i efikasnije primjere upravljanja državom u svim njenim segmentima.

Koalicija 143 će u narednom periodu, a **posebno uoči lokalnih izbora 2012. godine**, poduzeti niz aktivnosti koji će imati za cilj da **jačaju nadležnosti lokalnog nivoa vlasti** koji se do sada pokazao kao najodgovorniji prema građanima/kama. U svom radu Koalicija 143 će pokušati da jasno definiše i spusti na lokalni nivo jurisdikcije iz mnogih društvenih oblasti kao što su **kultura, sport, poljoprivreda, obrazovanje**, te da na taj način rad u ovim oblastima učini mnogo efikasnijim i transparentnijim.

Na konferenciji za medije su govorili **Nenad Trbojević**, UG „Oštra nula“ iz Banja Luke, **Kata Marijan Krželj**, Centar za Građansku Suradnju iz Livna, **Alen Tatić**, UG „Akcija građana“ iz Sarajeva i **Osvit Seferović**, Građanski Front Ostalih iz Mostara.

Kata Marijan Krželj se osvrnula na ciljeve koalicije i izjavila kako je **Koalicija 143 odgovor na složeno institucionalno uređenje BiH**, iz kojeg proizlaze neefikasni i netransparentni nivoi vlasti koji ne obavljaju svoju osnovnu ulogu a to je da budu servis građana.

Alen Tatić iz UG „Akcija građana“ je nakon nje izrazio nadu da će Koalicija za lokalnu samoupravu u mjesecima koji dolaze uspjeti ponuditi realnu alternativu postojećem sistemu koji bi građanima vratio nadu da kroz **djelovanje u svojoj lokalnoj zajednici mogu riješiti svoje probleme i potrebe**.

Nenad Trbojević iz „Oštre nule“ je **naglasio značaj lokalnih izbora za kampanju koalicije**: „Vjerujem da će lokalni izbori 2012. godine donijeti značajne promjene u načinu na koji građani traže odgovornost svojih lokalnih izabranika“, dok je Osvit Seferović iz Građanskog fronta ostalih naglasio kako ovom **prezentacijom i deklaracijom Koalicija 143 postavlja kamen temeljac u borbi za jaču lokalnu samoupravu**, za vlast bližu narodu kao i početak promjena političke prakse na lokalnom nivou.

Na kraju, svi učesnici su zajednički zaključili kako Koalicija 143 ima snagu i odlučnost da uvede suštinske promjene u načinu kako funkcioniše vlast, kako na lokalnom nivou, tako i uopšte u BiH, te da civilno društvo mora da bude nosilac tih promjena.

Kontakt: koalicija143@gmail.com

Koalicija na Facebook:

<http://www.facebook.com/pages/COALITION-143/266849790027671?sk=wall>